

KE MANA KITA HENDAK DIBAWA...?

BINALAH SUSUNAN PELAJARAN RENDAH ISLAM LEBIH DAHULU

Di bawah tajuk rencana ini di dalam keluaran yang lalu saya telah memberi pandangan dan fikiran ke atas keputusan Muktamar Islam Tenggara Asia dan sebagai suatu masalah tajaan bagi menyampaikan kepada cita-cita ini maka lebih dahulu moleklah kita mengkaji lebih dalam dan tepat atas asas-asas binaan pelajaran rendah sekolah-sekolah agama di Semenanjung Tanah Melayu ini yang menjadi asas kepada binaan sekolah-sekolah yang lebih tinggi yang telah menjadi cita-cita sebelum lagi sampai masanya. – Yakni suatu cita-cita yang nampaknya belum duduk sudah berlari.

SEKOLAH AGAMA JOHOR

(Oleh Ahmad Lutfi)

Jika ditilik dengan saksama maka asas-asas bagi sebuah universiti itu dasarnya daripada sekolah rendah. Susunan dan peraturan sekolah-sekolah rendah itu adalah melayakkan kepada penuntut-penuntut bagi mengisi bangku-bangku di dalam universiti dan sebab itulah oleh sebab keadaan sekolah-sekolah rendah bagi orang-orang Melayu keadaannya belum boleh lagi dikatakan sempurna itulah menjadi sebab penuntut-penuntut Melayu di dalam Universiti Malaya yang ada sekarang tidak memadai (terlampau sedikit).

Asas-asas pelajaran, terutamanya di sekolah-sekolah Melayu itu telah dipandang oleh sebahagian orang adalah semata-mata hanya, bagi menghilangkan masa umur kanak-kanak itu ke sekolah yang lebih tinggi.

Peluang-peluang yang didapat oleh anak-anak Melayu dalam pelajaran itu dapat dibuktikan sangat sedikit. Murid-murid yang lulus dalam peperiksaan empat tahun dalam sekolah Melayu itu di dalam seribu banyaknya dipukal rata boleh dikata tidak ada 40 orang yang dapat peluang untuk meneruskan pelajarannya ke sekolah Inggeris yang menjadi sebab pula ada orang yang mengatakan bahawa sekolah Melayu itu diadakan kepada orang-orang Melayu hanya untuk melepaskan taksir jua – tidak ditujukan kepada meninggikan darjah atau taraf kedudukan orang-orang Melayu bagi “melayukkan dirinya memerintah di dalam negerinya sendirinya” – sebagai yang tersebut di dalam perjanjian Federation.

Ada pula sebahagian pihak – bukan daripada orang lain orang kita sendiri berpendapat bahawa sebab kurang pengisi Universiti Malaya itu daripada orang-orang Melayu tidak lain sebabnya kerana masa pelajaran bagi anak-anak Melayu itu tersangat banyak atau terlampau rencam dan dengan sebab itulah fikirannya itu lalu dibawanya ke Johor dengan diberi alasan bahawa kanak-kanak sekolah itu terlampau banyak masanya belajar oleh sebab di sebelah petang ia masuk pula ke sekolah agama yang diatur dan ditaja oleh Jabatan Agama Johor dan dengan alasan itu ia mendatangkan syor supaya Sekolah Agama Johor itu disatukan dalam pelajaran Sekolah Melayu dan perkara itu telah pun dibawa ke dalam Majlis Mesyuarat Kerajaan Johor dan nampaknya dari semasa ke semasa cita-cita itu semakin dikuatkan oleh orang-orang yang tidak cinta agama dengan memandang bahawa perbelanjaan bagi tempat pengajaran agama itu adalah membazir jua.

Sekiranya menurut pendapat saya, sebab adanya sekolah agama itu kekurangan orang-orang Melayu melayukkan dirinya masuk ke universiti maka mengapakah di Semenanjung Tanah Melayu ini Johor itulah orang-orang Melayu yang banyak menjadi pengisi Universiti Malaya itu – tidak dari Melaka atau Pulau Pinang yang tidak ada mempunyai sekolah-sekolah agama. Oleh itu sudah tentu alasan yang demikian itu bukan pada tempatnya dan jika hendak dijadikan hujah carilah alasan yang lain jangan dijadikan sebab sekolah agama itu.

Sahib al-Fadhilah as-Syed Alwi bin Thahir al-Haddad,
Mufti Kerajaan Johor di dalam suatu jamuan telah pernah
berkata bahawa sepanjang yang diketahuinya di dalam negeri-negeri yang telah
dilawatinya sekalipun pelajaran sekolah-sekolah agama Johor
itu rendah tetapi peraturan dan pentadbirannya adalah
menjadi sebaik-baik pentadbiran yang pernah dilihatnya sama ada
di negeri Arab atau pun di lainnya. Di Johor semuanya ditadbir
oleh kerajaan dan oleh jabatan yang tertentu.

Perkataan ini adalah yang benar dan sesungguhnya sekiranya sekolah agama itu disatukan kepada sekolah-sekolah Melayu sebagaimana yang dikehendaki oleh sebahagian daripada mereka-mereka yang bolehlah disifatkan tidak kasih kepada agama Islam itu, sudah tentu akan merugikan penduduk Johor yang beragama Islam oleh sebab kehendak dan perasaan orang yang kasihkan Islam hari ini menghendaki supaya binaan kepada sekolah agama di Johor itu lebih disempurnakan dan dibesarkan daripada apa yang ada hari ini – bukannya di sambil-sambilkan sebagaimana kehendak-kehendak mereka itu.


Dengan adanya cita-cita mengadakan universiti Islam itu maka menurut pandangan saya sudah pada tempatnya hari ini hendaklah lebih dahulu ketua-ketua agama bagi daerah-daerah di seluruh Semenanjung Tanah Melayu ini bekerja keras bagi mengadakan sekolah-sekolah agama yang teratur sekurang-kurangnya sebagaimana di Johor atau pun lebih lagi dengan mensesuaikan pelajaran-pelajaran itu dengan pelajaran duniaiah supaya daripada pelajaran-pelajaran itu kelak dapat disesuaikan kehidupan mereka di atas pekerjaan umum sehari-hari yang dihadapi oleh mereka.

Walau bagaimanapun percubaan yang telah didatangkan untuk mengurangkan penghargaan kepada perdirian agama di dalam daerah Johor itu oleh orang-orang yang bolehlah disebut sebagai Islam geografi itu menjadi seperkara yang patut dicemburi tujuan-tujuannya oleh orang-orang kita dan juga oleh Jabatan Agama Johor dan sekiranya lah keadaan yang sedemikian itu dipaksakan kepada Jabatan Agama Johor mengikutnya maka semoleknya lebih baik, menurut pendapat saya, diisyiharkan sahaja bahawa adanya Jabatan Agama Johor itu bukannya bagi memperbaiki keadaan

dan kedudukan masyarakat dan pelajaran-pelajaran Islam dah hal ehwal orang-orang Islam tetapi jabatan itu hanya harus dijadikan topeng atau dijadikan tempat untuk punca-punca mengadakan istiadat yang berselaput dengan khurafat-khurafat yang patut dikikis daripada adanya di dalam suatu jabatan yang menamakan dirinya dengan agama Islam.

Mudah-mudahan sebagaimana adanya ahli-ahli jabatan agama yang ada sekarang dapat bekerja kuat dan lebih tepat menyampaikan segala cita-cita yang dikehendaki oleh orang-orang Islam dan dapatlah hendaknya mereka itu menjauhkan daripada perbuatan-perbuatan orang-orang kita sendiri yang cuba menyertai percubaan untuk melemahkan kedudukan dan hak serta kebebasan beragama yang diberi kepada kita kononnya bertopeng bagi faedah masyarakat tetapi bertujuan untuk meruntuh asas-asas Islam dengan mengukur dirinya yang boleh disifatkan tidak sedikit pun menaruh kecenderungan kepada agama Islam itu adanya.

Dunia itu tidak menjadi ramai dan heboh dan pahala itu tidak didapati kalau tidak ada syaitan di dunia.
– kata Arif.



A. Salim Aqib (Kubra) dari Kedah dan Tuan Haji Muhammad Said dari Pulau Pinang kedua-duanya Penolong Pegawai Tanam-tanaman Malaya yang sedang melawat Amerika Syarikat dalam setahun di bawah rancangan bantuan teknikal Amerika mereka sedang melihat seorang doktor dalam perusahaan beternak sedang memasukkan ubat ke dalam telur-telur bagi menyiasat penyakit binatang. – gambar USIS.